

續修陳州志

五

續脩陳州志卷之三

高維嶽校訂

知州加三級王清彥

脩陳州莫爾淮纂輯

知州加二級張喆

張錫泰閱

人物志

名賢 鄉賢 選舉 進士 舉人 貢生

武進士 武舉 監生 掾曹 封贈

武功 節義 流寓 旌義

貞烈 淑媛 仙釋 方伎

昔稱地靈人傑愚謂人傑而地藉以靈蓋兩者

異指而實相成焉陳無名山大川爲所毓秀而

代不乏賢懿軌芳風其令人仰且沐者山高水
長矣矧有愛其土而居之與儼然辱而臨之者
又爲茲土增重何論地氣靈哉乃忠義迭出節
烈數見毋亦其風化然耶間有著二氏之神奇
攻諸術之精詣卽君子不爲然而道雖大不盡
雖小不遺也並列爲傳用見陳之所產者未嘗
乏人云

名賢

春秋

洩冶陳靈公大夫公與孔寧儀行父通于夏姬皆
衷其袒服以戲于朝冶諫曰公卿宣淫民無效
焉且聞不令君其納之公曰吾能改矣告二子
二子請殺之公弗禁遂殺冶鄧元見洩冶被殺
知陳之將亡也迺去之以其族行

左傳

逢滑陳惠公大夫惠公薨懷公初立吳入楚使召
公朝國人而問焉曰欲與楚者右欲與吳者左
陳人從田無田從黨滑當公而進曰臣聞國之
興也以福其亡也以禍今吳未有福楚未有禍

楚未可棄吳未可從而晉盟主也若以晉辭吳
若何公曰國勝君亡非禍而何對曰國之有是
多矣何必不復小國猶復况大國乎臣聞國之
興也視民如傷是其福也其亡也以民爲土芥
是其禍也楚雖無德亦不艾殺其民吳日敝於
兵暴骨如莽而未見德焉天其或者正訓楚也
禍之適吳其何日之有公從之

左傳

顓孫師字子張陳人孔子弟子孔子曰自吾得師
前有光後有輝子貢曰美功不伐貴位不善不

侮不伐不傲無告是師之行也唐贈陳伯宋封

宛丘侯再封陳國公陞十哲位

巫馬施子子期陳人孔子弟子孔子來游子期與

子路薪於韞丘之下國之富人有處師氏者脂

車百乘觴於韞丘之上子路語子期曰使子無

忘子之所知亦無進子之所能得此富終身無

復見夫子子爲之乎子期喟然仰天而嘆闕然

投鎌于地曰吾聞之夫子勇士不忘喪其元志

士仁人不忘在溝壑子不知子與試子與意者

其志與子路慚負薪先歸嘗宰單父先是魯人
宓子賤爲單父宰鳴琴而治子期繼之以星出
星入日夜不處而單父亦治子期問於子賤曰
子鳴琴而單父治亦不見其勞何也子賤曰我
任人子任力任人者佚任力者勞子期曰是施
之未至也唐贈鄆伯宋封東阿侯

陳元字子禽陳人孔子弟子陳子車死於衛其妻
與其家大夫諒以殉葬定而后元至以告曰夫
子疾莫養於下請以殉葬元曰以殉葬非禮也

雖然則彼疾當蠶者孰若妻與宰得已則吾欲
已不得已則吾欲以二子者之爲之遂弗果用
唐贈潁伯宋封南頓侯

公良孺字子正陳人孔子弟子賢而有勇孔子適
衛路出於蒲會公孫氏以蒲叛衛而止之公良
孺以私車五乘從夫子行喟然曰昔吾從夫子
遇難於匡伐樹於宋今遇困於此命也夫吾與
夫子再罹難寧鬪而死挺劍而合衆將與之戰
蒲人懼曰苟無適衛吾則出子乃盟孔子而出

之東門孔子遂適衛唐贈東牟伯宋封牟平侯
世碩陳人七十子之弟子著書二十一篇名世子
以爲人性有善有惡舉人之善性養而致之則
善長惡性養而致之則惡長如此則性各有陰
陽善惡在所養焉宓子賤漆雕開公孫尼子之
徒亦論性情與世子養書篇相出入云

論衡

芋戶蓋陳閔公大夫楚師伐吳及桐汭公使公孫
貞子往弔蓋爲上价行及於良貞子卒蓋將以
尸入吳子使太宰嚭勞且辭曰以水潦之不特

無乃凜然隕大夫之尸以重寡君之憂寡君敢
辭蓋對曰寡君聞楚爲不道荐伐吳國滅厥民
人寡君使蓋備使弔君之下吏無祿使人逢天
之憾大命隕隊絕世於良廢日其積一日遷次
今君命逆使人曰無以尸造於門是我寡君之
命委於草莽也且臣聞之曰事死如生禮也於
是卒與朝聘而終以尸將事之禮又有朝聘而
遭喪之禮若不以尸將命是遭喪而還也無乃
不可乎以禮防民猶或踰之今大夫曰死而棄

之是棄禮也其何以爲諸侯主先民有言曰無
穢虐士備使奉尸將命苟我寡君之命達於君
所雖隕於深淵則天命也非君與涉人之過也

吳人內之

左傳

漢

應曜陳人隱居有盛名高帝時嘗與四皓俱徵曜
獨不至天下爲之語曰商山四皓不如淮陽一

老

舊志

鄭當時者字莊陳人也孝文時莊以任俠自喜

張羽於厄聲聞梁楚間孝景時爲太子舍人每
五日洗沐常置驛馬長安諸郊存諸故人請謝
賓客夜以繼日至期旦常恐不偏莊好黃老之
言其慕長者如恐不見年少官薄然其游知交
皆其大父行天下有名之士也武帝立累遷江
都相至九卿爲右內史莊誠門下客至無貴賤
無畱門者執賓主之禮以其貴下人莊廉又不
治產業仰奉賜以給諸公然其餽遺人不過算
器食每朝候上之間說未嘗不言天下長者其

推轂士及官屬丞吏誠有味其言之也常引以爲賢於已未嘗名吏與官屬言若恐傷之聞人之善言進之上唯恐後山東士以此翕然稱鄭莊及居郡卒後家無餘貲財莊兄弟子孫以莊故至二千石六七人焉

史記
節文

汝郁字叔異陳人性仁孝五歲時母病不能食郁常抱持啼泣亦不食母憐之強爲飯給言已愈郁察母顏色不平輒復不食宗親共異之因字曰異及親歿遂隱處山澤賈逵薦於和帝帝

之甚見優禮後累遷爲魯相以德教化百姓稱

之流人歸者八九千戶

參漢書東觀記

魏昭字德公陳人童子時大原郭泰止陳昭知其有異求入其房供給灑掃泰曰年少當精義書易爲來近我乎昭曰蓋聞經師易遇人師難遭故欲以素絲之質附近朱藍爾泰美其言聽與共止嘗不佳夜命昭作粥粥成進泰泰一啜怒而呵之曰爲長者作粥而不加敬使沙不可食耶以杯擲地昭更爲粥重進泰復呵之如此者

三昭容色無變意殊悅泰曰吾始見子之面今

乃見子之心遂與友善卒爲妙士

漢紀參
通鑑

張季禮陳人遠赴師喪行至汝南界中遇寒水車

毀頓滯道路潁陰劉翊子相見而謂之曰君慎

終赴義行宜速達卽下車與之不告姓名策馬

去季禮意其子相也後故到潁陰還所假乘翊

閉門辭行不與相見云

後漢書
劉翊傳

三國

陳駐陳人與陳留濮陽逸沛郡蔣纂廣陵梁超皆

單貧有志時吳丞相陸遜弟珣字子璋少好學
篤義融等因就與之游處珣亦割少分甘與同

豐約焉

三國志
陸珣傳

昔

周翼字子鄉陳人祖奕上谷太守父優車騎咨議

翼幼孤依舅高平郗鑒值永嘉喪亂饑饉相望

鄉人以鑒名德傳共飴之鑒嘗謂兄子邁及二

小兒往食鄉人曰各自饑困以君之賢欲共濟

君爾恐不能兼有所存鑒於是獨往食含飯著

兩頰邊吐與二兒後並得存同過江鑒亡翼爲
剡縣解職歸席苦於鑒靈牀頭心喪終三年歷

青州刺史少府卿六十四而卒

世說新語
周氏譜

王隱字處叔陳人世寒素父銓歷陽令少好學有

著述之志旁私錄晉事及功臣行狀未就而卒

隱以儒自守不交勢援博學多聞受父遺業西

都舊事多所詣究建興中過江丞相軍諮祭酒

涿郡祖納雅相知重納好博奕隱每諫止之納

曰聊用忘憂耳隱曰古人遭時則以功達其道